

Minister Dowers:

Leerplicht ta un instrumento na bienestar y pa proteccion di nos muchanan



ORANJESTAD - Dialuna anochi na Universidad di Aruba a tuma luga un anochi di informacion y intercambio tocante e prome 100 dianan di Leerplicht. Despues di su aprobacion den Parlamento e ley di Enseñansa Obligatorio a cana su caminda y a wordo introduci na Aruba 100 dia pasa; su maneho ta resorta bao di Bureau Leerplicht. E ley di enseñansa obligatorio ta envolve un cantidad di part-

ner y tin hopi pregunta ta biba den enseñansa, pero tambe den famianan y un momento di intercambio manera a tuma luga dialuna ta importante, segun Minister di Enseñansa, Arthur Dowers.

E mandatario a motiva particularmente esnan cu a haya nan mes cu retonan y preocupacionnan den e proceso di adopta e ley aki den practica pa comparti nan experiencia y haci pregunta.

E ley t'ey pa principalmente garantisa cu tur mucha ta haya educacion y e aspecto mas importante ta pa haya un entrada cerca muchanan cu no ta bay scol of ta hopi ausente, Minister Dowers a subraya. El a añadi cu e ley no a wordo introduci pa sanciona mayornan, pero pa yuda e mucha y resolve retonan cu tin como consecuencia cu e mucha no ta bay scol.

Enseñansa Obligatorio ta un

instrument hopi interesante y importante cu nos por uza na bienestar y pa proteccion di nos muchanan y nan futuro, Minister Dowers a subraya.

Hopi bes e absentismo frecuente of completo di un mucha for di e sistema di enseñansa ta un sintoma di algo mas grave den comunidad of den e famia. E consecuencianan di e falta di intervencion por resulta malo pa e mucha mes. Minister Dowers a splica

cu desafortunadamente un cantidad grandi di muchanan cu no ta bay scol ta resulta despues hopi halto representa den e sistema hudicial como cu nan ta haya nan mes envolvi den un of otro acto ilícito. Pues, ta esencial pa nos percura pa nos muchanan bay scol, educa nan mes y asina ta evita pa nan haya nan mes envolvi den crimen.

Leerplicht mester bay man den man cu desaroyonan riba tereno social, cual ta provee e apoyo na e famia y e mucha pa cumpli cu e ley di enseñansa obligatorio. Ademas, ta creando oportunidadnan pa e muchanan pa kende participacion na enseñansa tradicional ta difícil of imposibel, pa asina nan por toch participa tambe na e sistema di enseñansa. Riba e combinacion di foto por tira un bista di e anochi di informacion cu a tuma luga den aula di Universidad di Aruba cu a wordo bon concuri. □